



國朝耆獻類徵初編



明倫彙編
家範典
孝行典
卷一百一十五



國朝耆獻類徵初編卷百八十三目錄

疆臣三十五

陸燿

塔永甯

王士棻

葉佩蓀

雅德

郭世勳

楊魁

補錄

陸燿

國朝耆獻類徵初編卷百八十三

通奉大夫前署江西巡撫江西布政使司布政使湘陰李桓輯

疆臣三十五

陸燿

陸燿江蘇吳江人乾隆十七年舉人十九年考授內閣中書二十八年遷戶部主事三十一年遷員外郎三十三年遷郎中三十五年八月選雲南大理府知府以親老改補近省十二月調山東登州府知府三十六年調濟南府知府三十七年二月以新選山西老營堡巡檢鉅野縣吏員趙義之子汝棟頂父名投驗領憑經盤詰訊供在監畏罪自縊該管官防範不嚴奉旨交部嚴加議處

部議降一級抵銷八月擢甘肅西甯道九月 諭曰據徐績奏新

授西甯道陸燿稟稱蒙恩逾格擢用不敢以親老道遠爲詞懇請

給假一月送母至京居住卽行赴任陸燿旣因母老不能遠涉長

途該員在東省已歷年餘於地方諸務較爲諳練著卽畱於東省

補用誠屬兩便陸燿著調補山東運河道四十年擢按察使四十

一年以平陰縣捕役誣良毆斃縣民事部議降一級調用奉 旨

從寬改爲革職畱任四十二年 上東巡 恩旨開復降革處分

四十三年閏六月擢山東布政使十二月奏親母陳氏年老多病

請解任回籍終養 諭曰據陸燿奏親母陳氏見年七十九歲久

患痰證入冬以來病勢轉劇非臣親身調護則晝夜不甯而以此

牽懷必致公私兩負懇恩解任侍養等語所奏自屬實情伊母生長南方水土相習若回籍調治或可就痊陸燿著准其解任俾侍母南歸以遂其依母奉養之情四十六年十一月丁母憂四十七年九月以前在山東藩司任內失察倉庫虧空部議革任奉 旨陸燿著於補官日免其革任仍註冊十二月以興修山東運河隄工 諭曰前任山東布政使陸燿曾任運河道數年熟悉河務見在將屆服闋著卽前往山東會同沈啟震將應行修理各事宜妥協照料實心籌辦四十八年 命署理山東布政使四十九年四月服闋實授七月擢湖南巡撫五十年正月奏湖南省嶽麓城南兩書院肄業者多額設膏火有限請將從前積存息銀三千兩交

商行息以充膏火報 聞尋奏定例官員父母年七十以上家無次丁或年至八十以上雖有次丁俱准呈請終養蓋朝廷用人首重於孝孝於家而後可望其忠於國人子出仕有年其父母先已迎養在署自可朝夕承歡公私兼盡若父母初未隨任在外者不肖言歸轉出求仕致使垂白倚門或明知桑榆已迫強令跋涉相隨於名教大有關係懇祈 敕下各直省督撫不論見任及試用人員凡親年八十以上及獨子之親年七十以上者通飭呈明終養 上是之下部議行三月奏岳州府屬之臨湘縣向定爲衝繁難要缺在外揀選調補今查該縣幅員不廣軍民交涉事件自清釐屯田後各知遵守章程部選之員堪以勝任請改簡歸選部議

如所請行四月以山東藩司任內秋讞會審失入一案失出十案以內部議銷加一級再降一級畱任是月奏邵陽縣知縣魯大治於縣民田貢告因姦致卜陳氏自縊身死案不悉心研鞫輒將無辜之田文勝擬罪致田文勝之弟田學勝憂忿自盡請褫大治職寶慶府知府永柱於所屬偏聽枉斷不能覺察平反致田學勝自盡屍屬呈報時復批縣詳查致屍身發變請將永柱交部嚴議並聲明永柱見在告病上以該府於所屬命案瞻徇玩忽見在審辦未經完結自應歸於議處案內辦理何得准其告病著將陸燿交部議處部議降一級畱任六月奏湖南社倉本息穀及前撫臣劉墉奏令湘陰等四十五州縣勸捐穀十二萬節經前撫臣李世

傑等催繳臣到任後復勒限嚴催僅據耒陽等一十五州縣照數收齊其餘未足數者一十七處並有全未交收者十三處如湘陰巴陵武陵等縣濱臨江湖地多磽瘠桂陽瀘溪辰谿等縣介在山僻家鮮蓋藏若執前捐數目責令全完則民間未霑借貸之益轉受追呼之擾請以見在上倉穀數造報未收者停止催繳上可其奏是月因病奏請解任報 允旋卒

右 國史館本傳

天子任大吏以封疆之重必其學通達古今其心仁民愛物廉潔以持躬公正以率屬精敏以應事又得久於其治吏服民懷清和樂愷斯實樹殿邦之偉績而上酬咨岳之盛心也若乃謨猷漸著

眷倚方隆漏盡露晞中外嗟歎如 誥授資政大夫湖南巡撫

陸君者悲夫君諱燿字朗夫一字青來吳江人曾祖塏元祖銓考
瓚保德州吏目位卑而德劭餘事精漢隸妣金氏朱氏陳氏三世
皆以君貴累 贈封至資政大夫夫人君陳太夫人出也自幼寒
苦承庭訓篤志於學卽以君子自勵乾隆十七年壬申 恩科舉
於京兆甲戌會試明通考授內閣中書遭父艱服除入軍機處洊
歷戶部郎中 皇上知其才授山東登州府知府調濟南升運河
道按察使布政使至湖南巡撫君學優品端精析理義詳究前人
言行政績故事理通達無盤錯之難性澹泊操持謹確義利之辨
斷如也處事衷諸道不意爲同異所見旣審莫可搖奪爲郎官時

公卿藉以決疑議歲甲午在運河任壽張逆匪嘯聚距濟甯州二
百里良民生長太平猝驚駭君嚴禁諸官所毋或遠行滋民疑鄉
人爭入城慮良奸莫辨議閉門君曰賊未至何閉以示怯耶且忍
拒吾民使散逸被賊害或脅誘耶洞開重圍身坐其間稽察容納
民心大安未幾而天兵殲賊皆重君鎮定有方略云先是選大
理府改登州升西甯道調運河皆以母老蒙聖恩體恤及爲方
伯母夫人痰疾顛狂必君侍側少息叫號陳情歸侍溫綸垂允
而故宅無可居乃僑居禾中夜不解衣聞母聲響卽扶掖婉勸就
枕積六年遭喪旣葬起督運河隄工復任藩司年餘拜巡撫湖南
之命君於運河博稽詳驗洞悉源委機宜成備考六卷秉臬慎

重民命多所矜恤議免命案中徒犯解讞省拖累總藩時佐雜人
員壅積貧窘請停止分發又以虧空多請定耗羨倉穀數條奉
旨議行湖南鹽務有助公陋規至則峻卻之時鹽價奇昂遂勒減
其半社倉捐穀未輸者六萬二千七百餘石計貯穀已足請停止
催收親老來需次者劾歸養因請申明終養成例 上皆是之餘
如勅葺書院加惠生徒刊前修之遺集鈔 本朝之名文輯家乘
厚宗黨篤師友事不勝書不立講學之名言動胥歸儒術冠婚喪
祭世俗所謂常而戾於禮者一弗用其舉京兆也余薦冠本房幾
黜而卒登交誼最摯其僑居亦以余相親邇前年余病瀕於死賴
君擇醫品藥漸向愈扶羸送行自慮不及再見君豈意吉往凶歸

乃遽哭之乎君病猶視事及請解任越數日卒乾隆五十年六月二十三日也 上聞而惜之旣而事有與君涉者輒 諭及之下彌頌 聖主之知人而尤以偉抱未罄爲君憾爲斯民歎焉著有明夫詩藁切問齋文藁皆力追古作者初莅長沙夢吟七言長篇記一聯云能開衡嶽千層雲但飲湘江一杯水被其德者揮涕誦之年六十有三配陳夫人子三恩綬繩綱孫六恩綬先卒繩綱奉柩詣東顧阡十月庚子啟君自營生壙以葬泣請余誌之不忍辭也銘曰

通經致用兮卓爲朝英仰承 恩遇兮殫此寸誠衡峰聳嶸兮湘川深清輿誦方騰兮隙駒忽驚旌麾黯慘兮來歸邱塋不亡者存

今千秋令名

右墓誌銘馮浩撰

公姓陸名燿字朗夫吳江蘆墟人生卽端慤六歲受孝經論語以
古賢自期乾隆壬申舉京兆補中書入軍機房以戶部郎中補登
州府知府再遷運河道按察使權布政使事母病乞歸侍養終喪
天子命視運河授山東布政使湖南巡撫裁一年薨公起家寒
素性淡泊不慕寵榮惟於仁氓惠物之事朝夕宣究多識前言往
行其守濟南也上書徐中丞請截畱南糧爲積貯計任河道時上
書總河姚公請疏泉源增修月河作臬使時以徒犯罪輕請免解
司以省苦累署藩司時以流外壅積請停分發上皆是之公風

骨秀整靜氣迎人雖恂恂謙謹造次必於儒者而臨大事則屹不可動甲午壽張縣王倫作亂距運河甚近人情洶洶有欲閉城者公不可曰寇未至先閉城門是示之怯也且鄉民爭入城何忍棄之乃募鄉兵拒守而身自坐城闔彈壓稽察賊知濟甯有備不敢南向已而王師奏捷一城雞犬不驚公在樞垣倬直至於日晡猶不退猝有急務立辦以故大學士傅文忠公屢薦公上亦知公深凡巡幸處俱令扈從所奏察虧空事宜及救荒策俱蒙聖獎臨終前一月猶奏湖南社倉穀業已敷用其息穀請免徵收奉旨允行批到日方伯秦承恩捧劄子啟告柩前慰公泉下愛民之心時公已歿二十餘日矣天子聞公薨悼惜者再嗚呼以公

忠誠 天子之恩眷明良遇合千秋一時使再永其神明以竟其
用其所敷施必有更遠且大者而竟厄以無年壽止六十有四悲
夫公事母孝初選守大理府再遷甘肅監司俱以親老調近省撫
楚時見屬吏有篤老親猶來赴補惻然憫之奏官員凡親年七十
雖有次丁俱許終養一時中外官歸養者千餘人封公虔實先生
有清德卓行精八分書與枚京師有交甲辰冬枚過長沙公執後
進之禮甚恭曰昔先人題先生乞假歸娶圖某年十七侍旁磨墨
不敢忘也所著有河防要覽甘藷錄切問齋古文朗夫詩集若干
卷公三代皆以公貴受二品 封夫人陳氏三子恩綬繩綱俱修
飭能守家法孫六人以丙午十月葬公於吳江之東顧阡公 子